

(<https://news.usm.my>)

Berita Mutakhir

29 OCT

SUAMI SEBAK TERIMA IJAZAH SARJANA MENDIANG ISTERI



USM, PULAU PINANG, 29 Oktober 2017 – Seorang suami tidak mampu menahan rasa sebak apabila menerima Ijazah Sarjana milik isterinya pada Upacara Konvokesyen ke-55 Universiti Sains Malaysia (USM) yang berlangsung di Dewan Tuanku Syed Putra, di sini hari ini.

Lim Chin Heng, 46, berkata, dia menerima anugerah tersebut mewakili mendiang isterinya, Tan Soo Choo, 46, yang meninggal dunia pada 17 Oktober lalu akibat kanser kolon.

Katanya, isterinya mengambil Ijazah Sarjana Pendidikan (Psikologi Pendidikan) di Pusat Pengajian Ilmu Pendidikan, USM.

Bapa kepada tiga orang anak itu mengakui, mendiang isterinya seorang yang kuat semangat walaupun disahkan menghidap penyakit berbahaya ini tiga tahun lalu.

"Dia terus kuat semangat untuk meneruskan pengajiannya di peringkat sarjana walaupun sudah mengetahui tentang penyakit tersebut.

Malah, di saat-saat akhir sebelum beliau menghembuskan nafas terakhir, dia sangat bersemangat untuk hadir ke upacara konvokesyennya, tetapi hari ini, saya dan anak-anak terpaksa mewakilinya untuk menerima ijazah ini," katanya.

Ijazah Sarjana disampaikan Pro-Canselor USM, Tan Sri Dato' Dr. M. Jegathesan dan disaksikan oleh Naib Canselor USM, Profesor Datuk Dr. Asma Ismail dalam majlis khas selepas tamatnya sidang ketiga hari ini.

Chin Heng, yang juga Alumni USM tahun 1996, mahu meneruskan semangat yang ditonjolkan oleh mendiang isterinya kepada anak-anaknya supaya mengikut jejak kejayaan ibu mereka.

Tan Soo Choo adalah antara 6,850 orang graduan yang akan bergraduasi di USM bermula 28 Oktober sehingga 2 November nanti.

Teks: Syuhada Abd. Aziz



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>).

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>).

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015